

Na osnovu člana 138. stav 2. i člana 144. stav 3. Poslovnika o radu Doma naroda Parlamenta Federacije Bosne i Hercegovine („Službene novine Federacije BiH“, br. 27/03 i 21/09), Dom naroda Parlamenta Federacije Bosne i Hercegovine je na nastavku 21. vanredne sjednice, održane 5.6.2014. godine, nakon razmatranja Informacije o stanju prava branilačke populacije s Analizom primjene Zakona o provođenju kontrole zakonitosti korištenja prava iz oblasti branilačko-invalidske zaštite za period juli 2010. - 31. mart 2014. godine (član 11. Zakona o provođenju kontrole zakonitosti korištenja prava iz oblasti branilačko-invalidske zaštite „Službene novine Federacije BiH“, broj 82/09) sa zaključcima, usvojio sljedeće:

ZAKLJUČKE

1. U roku 30 dana formirati tim za koordinaciju revizije u skladu sa zakonom i Pravilnikom o formiranju i radu revizorskih timova za kontrolu i revizorskog tima za koordinaciju.
2. U roku 30 dana izvršiti usklađivanje sastava revizorskih timova u skladu sa odredbama zakona i Pravilnika o formiranju i radu revizorskih timova za kontrolu i revizorskog tima za koordinaciju.
3. Izvršiti usklađivanje svih zakona koji reguliraju branilačku oblast sa presudama Ustavnog suda Federacije Bosne i Hercegovine i bez odlaganja otkloniti sve posljedice koje su nastupile do presuda Ustavnog suda Federacije Bosne i Hercegovine.
4. U dogovoru sa Vladom Zapadnohercegovačkog kantona u roku 15 dana ukloniti prepreke reviziji, izvršiti povrat pečata u grupe za vojnu evidenciju i uspostaviti isplate korisnicima invalidnina sa područja ovog kantona.
5. Do 31.7.2014. godine izraditi Zakon o jedinstvenom registru pripadnika Oružanih snaga i korisnika prava iz oblasti branilačko–invalidske zaštite koristeći preciznu ratnu evidenciju svih boračkih kategorija i uputi u parlamentarnu proceduru.
6. U roku 45 dana dostaviti Parlamentu Federacije Bosne i Hercegovine Nacrt Zakona o demobiliziranim braniteljima.
7. Do 15.7.2014. godine u parlamentarnu proceduru uputiti Zakon o izmjenama i dopunama Zakona o povoljnijem penzionisanju branitelja odbrambeno-oslobodilačkog rata.
8. Zadužuje se Vlada Federacije Bosne i Hercegovine da u dogovoru sa kantonalnim vladama donese program zapošljavanja braniteljske populacije.
9. U roku 60 dana pokrenuti proceduru popune upražnjenih mjesta u Federalnom ministarstvu za pitanja boraca i invalida odbrambeno-oslobodilačkog rata u

skladu sa popisom stanovništva u Bosni i Hercegovini iz 1991. godine. Popunu izvršiti u skladu sa odredbom člana 7. Zakona o pravima branitelja.

10. U roku 30 dana pristupiti izmjenama Zakona o pravima branitelja i njihovih porodica na način da se u postupku utvrđivanja stepena invaliditeta za ranjene i zarobljene tokom rata ne može utvrditi postotak invalidnosti manji od 20%.
11. U skladu sa međunarodnim ugovorom između Republike Hrvatske i Bosne i Hercegovine Federalno ministarstvo za pitanja branitelja i invalida odbrambeno-oslobodilačkog rata hitno će okončati dostavu podataka koje je tražio Zavod mirovinskog osiguranja Republike Hrvatske.
12. Do 31.7.2014. godine dostaviti Parlamentu Federacije Bosne i Hercegovine informacije o stanju zaposlenosti pripadnika branilačke populacije u odnosu na ukupan broj zaposlenih u javnim poduzećima, javnim ustanovama, organima i tijelima uprave na nivou Federacije Bosne i Hercegovine sa stanjem na dan 31.12.2013. godine.
13. U roku 90 dana pristupiti izradi i dopuni postojećih zakonskih rješenja iz oblasti branilačko-invalidske zaštite kako bi se ispravio diskriminatorski odnos prema braniteljima koji nisu ostvarili svoja prava.
14. Rad organizacionih jedinica Federalnog ministarstva za pitanja branitelja i invalida odbrambeno-oslobodilačkog rata uskladiti sa odredbama Zakona o federalnim ministarstvima i drugim tijelima federalne uprave.
15. Ovi zaključci bit će objavljeni u "Službenim novinama Federacije BiH".

DN broj: 02-02-464/14
5. juni 2014. godine
S a r a j e v o

PREDSJEDAVAJUĆI
DOMA NARODA
PARLAMENTA FEDERACIJE BIH

Tomislav Martinović